

UPUTSTVO ZA PACIJENTA

MARPAD COMBO
5 mg + 1000 mg
filmom obložena tableta
dapagliflozin + metformin hidroklorid

Pažljivo pročitajte cijelo uputstvo prije nego počnete uzimati ovaj lijek jer sadrži Vama važne podatke.

- Sačuvajte ovo uputstvo. Možda ćete ga trebati ponovno pročitati.
- Ako imate dodatnih pitanja, obratite se ljekaru, farmaceutu ili medicinskoj sestri.
- Ovaj je lijek propisan samo Vama. Nemojte ga davati drugima. Može im naškoditi, čak i ako su njihovi znakovi bolesti jednaki Vašima.
- Ako primijetite bilo koju nuspojavu, potrebno je obavijestiti ljekara ili farmaceuta. To uključuje i svaku moguću nuspojavu koja nije navedena u ovom uputstvu. Pogledajte dio 4.

Šta se nalazi u ovom uputstvu

1. Šta je MARPAD COMBO i za šta se koristi
2. Šta morate znati prije nego počnete uzimati MARPAD COMBO
3. Kako uzimati MARPAD COMBO
4. Moguće nuspojave
5. Kako čuvati MARPAD COMBO
6. Sadržaj pakovanja i druge informacije

1. Šta je MARPAD COMBO i za šta se koristi

Ovaj lijek sadrži dvije različite aktivne supstance koje se zovu dapagliflozin i metformin. Obje pripadaju skupini lijekova koji se nazivaju oralnim antidijabeticima. To su lijekovi za liječenje šećerne bolesti koji se uzimaju kroz usta.

MARPAD COMBO se primjenjuje za liječenje jedne vrste šećerne bolesti koja se naziva „šećerna bolest tipa 2“ u odraslih bolesnika (u dobi od 18 ili više godina), koja se obično javlja u starijoj dobi. Ako imate šećernu bolest tipa 2, Vaša gušterača ne proizvodi dovoljno inzulina ili Vaše tijelo ne može pravilno iskoristiti inzulin koji proizvodi. To dovodi do visoke razine šećera (glukoze) u Vašoj krvi.

- Dapagliflozin djeluje tako da uklanja višak šećera iz tijela preko urina i snižava količinu šećera u krvi. Također može pomoći u sprječavanju srčane bolesti.
- Metformin djeluje uglavnom tako da sprječava proizvodnju glukoze u jetri.

Kod liječenja šećerne bolesti:

- Ovaj se lijek uzima u kombinaciji s dijetom i tjelovježbom.
- Ovaj lijek se koristi ako se šećerna bolest ne može kontrolirati drugim lijekovima koji se koriste za liječenje šećerne bolesti.
- Ljekar može zatražiti da uzimate samo ovaj lijek ili da ga uzimate s drugim lijekovima za liječenje šećerne bolesti. To može biti neki drugi lijek koji se uzima kroz usta i/ili lijek koji se primjenjuje injekcijom, kao što je inzulin ili agonist GLP-1 receptora (pomaže vašem tijelu da poveća proizvodnju inzulina kad je razina šećera u Vašoj krvi visoka).
- Ukoliko već uzimate zasebne tablete dapagliflozina i metformina, Vaš ljekar može zatražiti da prijedete na liječenje ovim lijekom. Da biste izbjegli predoziranje, nemojte nastaviti uzimati tablete dapagliflozina i metformina ako uzimate MARPAD COMBO.

Važno je da nastavite slijediti savjete o dijeti i tjelovježbi koje su Vam dali Vaš ljekar, farmaceut ili medicinska sestra.

2. Šta morate znati prije nego počnete uzimati MARPAD COMBO

Nemojte uzimati MARPAD COMBO

- ako ste alergični na dapagliflozin, metformin ili neki drugi sastojak ovog lijeka (naveden u dijelu 6.)
- ako ste ikada bili u dijabetičkoj komi
- ako imate nekontroliranu šećernu bolest uz, primjerice, tešku hiperglikemiju (visoka razina glukoze u krvi), mučninu, povraćanje, proljev, brz gubitak tjelesne težine, laktacidozu (pogledajte „Rizik od laktacidoze“ u nastavku) ili ketoacidozu. Ketoacidoza je stanje u kojem se supstance koje se nazivaju „ketonska tijela“ nakupljaju u krvi i mogu dovesti do dijabetičke pretkome. Simptomi uključuju bol u trbuhu, ubrzano i duboko disanje, pospanost ili Vam dah ima neobičan voćni miris.
- ako imate jako smanjenu funkciju bubrega
- ako imate tešku infekciju
- ako ste izgubili mnogo vode iz organizma (dehidracija), npr. zbog dugotrajnog ili teškog proljeva, ili ako ste povraćali nekoliko puta za redom
- ako ste nedavno imali srčani udar, patite od zatajivanja srca, imate ozbiljne tegobe s cirkulacijom ili poteškoće s disanjem
- ako imate tegoba s jetrom
- ako pijete velike količine alkohola (bilo svakodnevno ili samo povremeno) (molimo pogledajte dio „MARPAD COMBO s alkoholom“).

Ne uzimajte ovaj lijek ako se bilo što navedeno iznad odnosi na Vas.

Upozorenja i mjere opreza

Obratite se svom ljekaru ili farmaceutu prije nego uzmete MARPAD COMBO.

Rizik od laktacidoze

MARPAD COMBO može uzrokovati vrlo rijetku, ali vrlo ozbiljnu nuspojavu koja se naziva laktacidoza, posebno ako Vam bubrezi ne rade ispravno. Rizik od razvoja laktacidoze također je povećan uz nekontroliranu šećernu bolest, ozbiljne infekcije, dugotrajno gladovanje ili uzimanje alkohola, dehidraciju (dodatne informacije pogledajte u nastavku), tegobe s jetrom i sva zdravstvena stanja u kojima dio tijela ima smanjenu opskrbu kisikom (kao što je akutna teška srčana bolest).

Ako se nešto od navedenog odnosi na Vas, obratite se ljekaru za daljnje upute.

Prestanite nakratko uzimati MARPAD COMBO ako imate stanje koje može biti povezano s dehidracijom (značajan gubitak tjelesnih tekućina) kao što je jako povraćanje, proljev, vrućica, izloženost toplini ili ako pijete manje tekućine nego obično. Obratite se ljekaru za daljnje upute.

Prestanite uzimati MARPAD COMBO i odmah se obratite ljekaru ili otidite u najbližu bolnicu ako osjetite neke od simptoma laktacidoze, jer to stanje može dovesti do kome.

Simptomi laktacidoze uključuju:

- povraćanje
- bol u trbuhu (bol u abdomenu)
- grčevi u mišićima
- opće loše osjećanje uz jaki umor
- otežano disanje
- smanjena tjelesna temperatura i usporen rad srca

Laktacidoza je hitno stanje i mora se liječiti u bolnici.

Obratite se svom ljekaru, farmaceutu ili medicinskoj sestri prije nego uzmete MARPAD COMBO, i tokom liječenja:

- ako imate „šećernu bolest tipa 1“ - vrstu šećerne bolesti koja se obično javlja u mladosti i kod koje tijelo uopće ne proizvodi inzulin. MARPAD COMBO se ne smije koristiti za liječenje ove bolesti.
- ako iskusite nagli gubitak tjelesne težine, osjećaj mučnine ili povraćanje, bol u trbuhu, prekomjernu žeđ, ubrzano i duboko disanje, smetenost, neuobičajenu pospanost ili umor, zadah slatkog mirisa, slatki ili metalni okus u ustima, ili drugačiji miris mokraće ili znoja, odmah se javite ljekaru ili u

najbližu bolnicu. Ovi simptomi mogu biti znak „dijabetičke ketoacidoze“ - rijetkog ali ozbiljnog, ponekad i opasnog po život problema koji se može javiti uz šećernu bolest zbog povišenih razina „ketonskih tijela“ u mokraći ili krvi, što je vidljivo u nalazima pretraga. Rizik od razvoja dijabetičke ketoacidoze može biti povećan kod produženog gladovanja, prekomjerne konzumacije alkohola, dehidracije, iznenadnog smanjenja doze inzulina ili povećane potrebe za inzulinom zbog velikog hirurškog zahvata ili ozbiljne bolesti.

- ako imate tegoba s bubrezima. Ljekar će Vam provjeriti rad bubrega.
- ako imate vrlo visoke razine glukoze u krvi koje mogu dovesti do dehidracije (prekomjernog gubitka tekućine iz tijela). Mogući znakovi dehidracije navedeni su u dijelu 4. Obavijestite svog ljekara prije uzimanja ovog lijeka ako imate neki od navedenih znakova.
- ako uzimate lijekove za snižavanje krvnog pritiska (antihipertenzive) i ranije ste patili od niskog krvnog pritiska (hipotenzije). Više informacija možete pronaći u nastavku, u dijelu „Drugi lijekovi i MARPAD COMBO“.
- ako često imate infekcije mokraćnih putova. Ovaj lijek može uzrokovati infekcije mokraćnih putova pa će Vas Ljekar možda htjeti pomnije nadzirati. Ako se razvije ozbiljna infekcija, Ljekar će možda razmotriti privremenu promjenu liječenja.

Ako se morate podvrgnuti velikom hirurškom zahvatu, morate prestati uzimati lijek MARPAD COMBO tokom i još neko vrijeme nakon zahvata. Ljekar će odlučiti kada morate prekinuti i kada ćete nastaviti s liječenjem lijekom MARPAD COMBO.

Važno je redovito provjeravati svoja stopala i pridržavati se svih drugih savjeta o njezi stopala koje vam daje Vaš zdravstveni radnik.

Ako se nešto od gore navedenog odnosi na Vas (ili niste sigurni), obratite se svom ljekaru, farmaceutu ili medicinskoj sestri prije nego uzmete ovaj lijek.

Odmah se obratite svom ljekaru ako uočite kombinaciju simptoma boli, osjetljivosti (na dodir), crvenila ili oticanja genitalija ili područja između genitalija i anusa s vrućicom ili općim lošim osjećanjem. Ti simptomi mogu biti znak rijetke, no ozbiljne ili čak po život opasne infekcije koja se naziva nekrotizirajući fasciitis perineuma ili Fournierova gangrena koja uništava potkožno tkivo. Fournierovu gangrenu potrebno je odmah liječiti.

Funkcija bubrega

Tokom liječenja lijekom MARPAD COMBO, Ljekar će Vam provjeravati funkciju bubrega najmanje jedanput godišnje ili češće ako ste starija osoba i/ili ako Vam se funkcija bubrega pogoršava.

Glukoza u mokraći

Zbog načina na koji djeluje ovaj lijek, nalazi pretraga na šećer u mokraći bit će pozitivni dok uzimate ovaj lijek.

Djeca i adolescenti

Primjena ovog lijeka ne preporučuje se u djece i adolescenata mlađih od 18 godina jer u tih bolesnika lijek nije ispitan.

Drugi lijekovi i MARPAD COMBO

Ako trebate dobiti injekciju kontrastnog sredstva koje sadrži jod u krvnu žilu, na primjer, u sklopu rendgenskog snimanja ili skeniranja, morate prestati uzimati lijek MARPAD COMBO prije ili u vrijeme injekcije. Ljekar će odlučiti kada morate prekinuti i kada ćete nastaviti s liječenjem lijekom MARPAD COMBO.

Obavijestite svog ljekara ako uzimate, nedavno ste uzeli ili biste mogli uzeti bilo koje druge lijekove. Možda ćete češće morati raditi pretrage glukoze u krvi ili testove funkcije bubrega ili će Vam Ljekar trebati prilagoditi dozu lijeka MARPAD COMBO. Posebno je važno spomenuti sljedeće:

- ako uzimate lijekove koji povećavaju stvaranje mokraće (diuretici).
- ako uzimate druge lijekove koji snižavaju razinu šećera u krvi kao što je inzulin ili lijek sulfonilureja. Vaš će Ljekar možda htjeti smanjiti dozu tih drugih lijekova kako bi spriječio prenisoku razinu šećera u krvi (hipoglikemiju).

- ako uzimate litij jer MARPAD COMBO može smanjiti količinu litija u Vašoj krvi
- ako uzimate cimetidin, lijek koji se koristi za liječenje želučanih tegoba
- ako uzimate bronhodilatatore (beta-2 agoniste), koji se koriste za liječenje astme
- ako uzimate kortikosteroide (koriste se za liječenje upala kod bolesti poput astme i artritisa) koji se uzimaju kroz usta, kao injekcija ili inhalacijom
- lijekove koji se primjenjuju za liječenje boli i upale (NSAIL i COX-2-inhibitori, kao što su ibuprofen i celekoksib)
- određene lijekove za liječenje povišenog krvnog pritiska (ACE inhibitori i antagonisti receptora angiotenzina II).

MARPAD COMBO s alkoholom

Izbjegavajte prekomjerni unos alkohola dok uzimate lijek MARPAD COMBO jer to može povećati rizik od laktacidoze (pogledajte dio „Upozorenja i mjere opreza“).

Trudnoća i dojenje

Ako ste trudni ili dojite, mislite da biste mogli biti trudni ili planirate imati dijete, obratite se svom ljekaru ili farmaceutu za savjet prije nego uzmete ovaj lijek. Ako zatrudnite, morate prestati uzimati ovaj lijek jer se njegova primjena ne preporučuje u drugom i trećem tromjesečju trudnoće (posljednjih šest mjeseci trudnoće). Razgovarajte sa svojim ljekarom o najboljem načinu regulacije razine šećera u krvi tokom trudnoće.

Prije nego što uzmete ovaj lijek, razgovarajte sa svojim ljekarom ako želite dobiti ili ako već dojite. Ne smijete uzimati ovaj lijek ako dojite. Metformin se izlučuje u majčino mlijeko u malim količinama. Nije poznato izlučuje li se dapagliflozin u majčino mlijeko.

Upravljanje vozilima i mašinama

Ovaj lijek ne utiče ili zanemarivo utiče na sposobnost upravljanja vozilima i rada sa mašinama. Uzimanje ovog lijeka s drugim lijekovima koji snižuju razinu šećera u krvi, kao što je inzulin ili lijek sulfonilureja, može izazvati preniske razine šećera u krvi (hipoglikemiju), što može dovesti do pojave simptoma poput slabosti, omaglice, pojačanog znojenja, ubrzanih otkucaja srca, promjena vida ili poteškoća s koncentracijom te uticati na sposobnost upravljanja vozilima i rada sa strojevima.

Nemojte upravljati vozilima ni rukovati alatima ili strojevima ako počnete osjećati ove simptome.

Sadržaj natrija

Ovaj lijek sadrži manje od 1 mmol natrija (23 mg) po dozi, tj. zanemarive količine natrija.

3. Kako uzimati MARPAD COMBO

Uvijek uzmite ovaj lijek točno onako kako Vam je rekao ljekar. Provjerite s ljekarom ili farmaceutom ako niste sigurni.

Koliko lijeka uzeti

- Količina ovog lijeka koju ćete uzeti ovisi o Vašem stanju te o dozama metformina i/ili pojedinačnih tableta dapagliflozina i metformina koje trenutno uzimate. Ljekar će Vam reći točno koju jačinu ovog lijeka morate uzeti.
- Preporučena doza je jedna tableta dvaput na dan.

Uzimanje ovog lijeka

- Tabletu progutajte cijelu, s pola čaše vode.
- Uzmite tabletu s hranom. Na taj se način smanjuje rizik od pojave želučanih nuspojava.
- Uzmite tabletu dvaput na dan, jedanput ujutro (uz doručak) i jedanput navečer (uz večeru).

Ljekar može propisati ovaj lijek s drugim lijekovima za snižavanje razine šećera u krvi. To mogu biti neki lijekovi koji se uzimaju kroz usta ili lijekovi koji se primjenjuju injekcijom, kao što je inzulin ili agonist GLP-1 receptora. Nemojte zaboraviti uzimati druge lijekove koje Vam je preporučio ljekar. Tako ćete ostvariti najbolje rezultate za svoje zdravlje.

Dijeta i tjelovježba

Da biste šećernu bolest držali pod kontrolom, morate se i dalje pridržavati propisanoga režima prehrane i tjelovježbe, čak i dok uzimate ovaj lijek. Stoga je važno da se pridržavate savjeta o dijeti i tjelovježbi koje su Vam dali Vaš ljekar, farmaceut ili medicinska sestra. Naročito je važno da se, ako ste na dijeti za održavanje tjelesne težine namijenjene bolesnicima sa šećernom bolešću, nastavite pridržavati te dijetu dok uzimate ovaj lijek.

Ako uzmete više lijeka MARPAD COMBO nego što ste trebali

Ako uzmete više MARPAD COMBO tableta nego što ste trebali, može doći do pojave laktacidoze. Simptomi laktacidoze uključuju mučninu ili povraćanje, bol u želucu, grčeve u mišićima, ozbiljan umor ili otežano disanje. Ako se ovo dogodi Vama, možda ćete trebati odmah zatražiti liječenje u bolnici budući da laktacidoza može dovesti do kome. Odmah prestanite uzimati ovaj lijek i smjesta se javite ljekaru ili u najbližu bolnicu (pogledajte dio 2.). Uzmite pakovanje lijeka sa sobom.

Ako ste zaboravili uzeti MARPAD COMBO

Ako ste propustili dozu, uzmite ju čim se sjetite. Ako se ne sjetite do vremena kada je potrebno uzeti sljedeću dozu, preskočite propuštenu dozu i nastavite sa uobičajenim rasporedom doziranja. Nemojte uzeti dvostruku dozu ovog lijeka kako biste nadoknadili zaboravljenu dozu.

Ako prestanete uzimati MARPAD COMBO

Nemojte prestati uzimati ovaj lijek ako prethodno o tome niste razgovarali s ljekarom. Razina Vašeg šećera u krvi može porasti ako ne uzimate ovaj lijek.

U slučaju bilo kakvih pitanja u vezi s primjenom ovoga lijeka, obratite se ljekaru, farmaceutu ili medicinskoj sestri.

4. Moguće nuspojave

Kao i svi lijekovi, ovaj lijek može uzrokovati nuspojave iako se one neće javiti kod svakoga.

Prestanite uzimati MARPAD COMBO i odmah se javite ljekaru ako se pojavi bilo koja od sljedećih ozbiljnih ili potencijalno ozbiljnih nuspojava:

- **Laktacidoza**, vrlo rijetka (može se javiti u manje od 1 na 10 000 osoba), ali vrlo ozbiljna nuspojava koja se naziva laktacidoza (pogledajte dio 2. „Upozorenja i mjere opreza“). Ako Vam se to dogodi, morate **prestati uzimati lijek MARPAD COMBO i odmah se obratiti ljekaru ili otići u najbližu bolnicu**, jer laktacidoza može dovesti do kome.

Odmah se javite ljekaru ili u najbližu bolnicu ako se u Vas pojavi bilo koja od sljedećih nuspojava:

- **Dijabetička ketoacidoza**, rijetko zabilježena (može se javiti u do 1 na 1000 osoba)
Ovo su znakovi dijabetičke ketoacidoze (također pogledajte dio 2. „Upozorenja i mjere opreza“):
 - povišene razine „ketonskih tijela“ u mokraći ili krvi
 - nagli gubitak tjelesne težine
 - mučnina ili povraćanje
 - bol u trbuhu
 - prekomjerna žeđ
 - ubrzano i duboko disanje
 - smetenost
 - neuobičajena pospanost ili umor
 - zadah slatkog mirisa, slatki ili metalni okus u ustima ili drugačiji miris mokraće ili znoja.

Ovo se može javiti neovisno o razini šećera u krvi. Vaš ljekar može odlučiti privremeno ili trajno prekinuti Vaše liječenje lijekom MARPAD COMBO.

- **Nekrotizirajući fasciitis perineuma** ili Fournierova gangrena, ozbiljna infekcija mekog tkiva genitalija ili

područja između genitalija i anusa, što je vrlo rijetka nuspojava.

Prestanite uzimati MARPAD COMBO i što prije se javite ljekaru ako se pojavi bilo koja od sljedećih ozbiljnih ili potencijalno ozbiljnih nuspojava:

- **Infekcija mokraćnih putova**, što je česta nuspojava (može se javiti u do 1 na 10 osoba).

Ovo su znakovi teške infekcije mokraćnih putova:

- vrućica i/ili zimica
- osjećaj pečenja kod mokrenja
- bol u leđima ili slabinama.

Iako se krv u mokraći javlja manje često, ako je primijetite, odmah obavijestite ljekara.

Javite se ljekaru što je prije moguće ako se pojavi bilo koja od sljedećih nuspojava:

- **Niska razina šećera u krvi (hipoglikemija)** - što je vrlo česta nuspojava (može se javiti u više od 1 na 10 osoba) - kod uzimanja ovoga lijeka sa sulfonilurejom ili s drugim lijekovima koji snižavaju razinu šećera u krvi, kao što je inzulin.

Ovo su znakovi niske razine šećera u krvi:

- drhtanje, znojenje, snažan osjećaj tjeskobe, ubrzani otkucaji srca
- osjećaj gladi, glavobolja, promjene vida
- promjene raspoloženja ili osjećaj smetenosti.

Ljekar će Vam reći kako ćete liječiti niske razine šećera u krvi i što učiniti ako se pojavi neki od gore navedenih znakova. Ako imate simptome niske razine šećera u krvi, uzmite tablete glukoze, zalogaj sa visokim sadržajem šećera ili popijte voćni sok. Ako je moguće, izmjerite Vašu razinu šećera u krvi te se odmorite.

Ostale nuspojave uključuju:

Vrlo česte

- mučnina, povraćanje
- proljev ili bolovi u trbuhu
- gubitak apetita.

Česte

- genitalna infekcija (mliječac) na penisu ili u vagini (znakovi mogu uključivati iritaciju, svrbež, neuobičajeni iscjedak ili neugodan miris)
- bol u leđima
- nelagoda prilikom mokrenja, pojačano mokrenje nego inače ili češća potreba za mokrenjem
- promjene količine holesterola ili masti u krvi (vidljivo iz nalaza pretraga)
- povećanje broja crvenih krvnih stanica u krvi (vidljivo iz nalaza pretraga)
- smanjenje bubrežnog klirensa kreatinina (vidljivo iz nalaza pretraga) na početku liječenja
- promjene u okusu
- omaglica
- osip
- smanjene ili niske razine vitamina B12 u krvi (simptomi mogu uključivati izrazit umor, bolan i crven jezik (glositis), trnce i bockanje (parestezija) ili blijedu ili žutu kožu). Ljekar može dogovoriti neke pretrage kako bi se otkrio uzrok simptoma jer neki od njih također mogu biti izazvani šećernom bolešću ili drugim nepovezanim zdravstvenim tegobama.

Manje česte (mogu se javiti u do 1 na 100 osoba)

- prekomjeren gubitak tekućine iz tijela (dehidracija; znakovi mogu uključivati vrlo suha ili ljepljiva usta, smanjeno mokrenje ili potpuni prestanak mokrenja ili ubrzane otkucaje srca)
- žeđ
- zatvor
- buđenje noću radi mokrenja
- suha usta
- smanjenje tjelesne težine
- povećanje razine kreatinina (vidljivo iz nalaza laboratorijskih pretraga krvi) na početku liječenja

- povećanje razine ureje (vidljivo iz nalaza laboratorijskih pretraga krvi).

Vrlo rijetke

- abnormalnosti u nalazima funkcije jetre, upala jetre (hepatitis)
- crvenilo kože (eritem), svrbež ili osip koji svrbi (koprivnjača)
- upala bubrega (tubulointersticijski nefritis).

Prijavljivanje nuspojava

Ako primijetite bilo koju nuspojavu, potrebno je obavijestiti ljekara, farmaceuta ili medicinsku sestru. To uključuje i svaku moguću nuspojavu koja nije navedena u ovom uputstvu. Prijavljivanjem nuspojava možete pridonijeti u procjeni sigurnosti ovog lijeka.

5. Kako čuvati MARPAD COMBO

Lijek čuvajte izvan pogleda i dohvata djece.

Ovaj lijek se ne smije upotrijebiti nakon isteka roka valjanosti navedenog na blisteru ili kutiji iza oznake „EXP“ ili „Rok valjanosti“. Rok valjanosti odnosi se na zadnji dan navedenog mjeseca.

Lijek čuvati na temperaturi ispod 25°C.

Nikada nemojte nikakve lijekove baciti u otpadne vode ili kućni otpad. Pitajte svog farmaceuta kako baciti lijekove koje više ne koristite. Ove će mjere pomoći u očuvanju okoliša.

6. Sadržaj pakovanja i druge informacije

Šta MARPAD COMBO sadrži

- Aktivne supstance su dapagliflozin i metformin hidrohlorid.

Jedna MARPAD COMBO 5 mg/1000 mg filmom obložena tableta (tableta) sadrži 5 mg dapagliflozina i 1000 mg metformin hidrohlorida.

Drugi sastojci su:

- jezgra tablete: mikrokristalična celuloza (E460(i)), povidone K-30, silicij ,koloidni bezvodni (E1201), kroskarmeloza natrij (E468), magnezijev stearat (E470b).
- film ovojnica: škrob,rižin, izomaltoza (E953), hipermeloza 2910 (E464), trigliceridi srednjeg lanca, željezni oksid, žuti (E172), željezni oksid, crni (E172)

Kako MARPAD COMBO izgleda i sadržaj pakovanja

MARPAD COMBO 5 mg/1000 mg su žuto obojene, bikonveksne film tablete u obliku kapsule, s utisnutim brojem "441" s jedne strane i bez oznake s druge strane.

MARPAD COMBO 5 mg/1000 mg filmom obložene tablete su dostupne u PVC/PVD/Al blisterima, veličine pakovanja od 30 filmom obloženih tableta (2 blistera sa po 15 tableta), u kutiji.

Režim izdavanja lijeka

Lijek se izdaje na ljekarski recept.

Naziv i adresa proizvođača (administrativno sjedište)

FARMAVITA d.o.o. Sarajevo
Igmanska 5a
71320 Vogošća, Bosna i Hercegovina

Proizvođač gotovog lijeka (mjesto puštanja lijeka u promet)

FARMAVITA d.o.o. Sarajevo
Igmanska 5a

71320 Vogošća, Bosna i Hercegovina

Ime i adresa nosioca dozvole za stavljanje gotovog lijeka u promet

FARMAVITA d.o.o. Sarajevo

Igmanska 5a

71320 Vogošća, Bosna i Hercegovina

Broj i datum rješenja o dozvoli za stavljanje gotovog lijeka u promet

Marpad Combo 5 mg + 1000 mg, filmom obložena tableta: 04-07.3-1-6010/25 od 23.12.2025. godine

Datum izrade uputstva

23.12.2025. godine